





南唐書序



傳曰太熙之後述史者幾乎罵矣  
唐季五代大盜割據各有史而  
太熙之風徃徃有之南唐寢滅史  
官高遠慮貽後悔悉取史草焚之  
而死徐鉉湯悅奉

太宗皇帝勅追錄所聞而忘遠取



近率皆踈畧先祖太博元康世家金  
陵知多南唐故事旁搜舊史遺文  
并集諸朝野之能道其事者未及  
撰次遽捐館舍今輒不自料纂先  
志而成之列為三十卷雖有愧於  
筆削而誅亂尊王亦庶幾焉崇寧  
乙酉春正月陽羨馬令

南唐書序

馬令撰

嗚呼五代之亂符璽竊於大盜中  
國變於夷狄先王之禮樂制度掃  
地盡矣李氏初據江淮建唐廟以  
隆親與夫祖契丹而絕其父者孰  
諱始郊祀於圓丘與夫尚野祭而



焚紙紙者孰重五代之君若彼南  
唐之制若此則正統疑於不存而  
僭竊疑於無罪也予作此書尊天  
子於中原而僭偽之事則不爲南  
唐諱者豈無意哉蓋尊天子所以  
一天下之統書其僭所以著李氏  
之罪其統旣一其罪旣著則竊土

賊民者無遁刑於天下後世矣昔  
孔子作春秋非徒載其陳言也竊  
取其義以爲人道之大法而已予  
之所論有合於此者弗可不察也  
王通之作元經第以進退南北而  
亂其正統輒自比於孔子曰春秋  
元經於王道是輕重之權衡且孔



子所書彼善於此則有之而正統  
常在於周通之所書者宋魏之間  
其統未嘗一也使後世擾擾而不  
知其正者必自通始嗚呼法春秋  
而不知春秋之法者豈特王通乎

南唐書目錄

禮  
卷第一

先主書

卷第二

嗣主書

卷第三

嗣主書

卷第四

嗣主書

樂  
卷第五



後主書

卷第六

女憲傳

元恭宋后 种氏

光穆鍾后 昭惠周后

周后 保儀黃氏 徐主 永興公主

余洪妻鄭氏附 渤海吳媛附

卷第七

宗室傳

楚王景遷 晉王景遂 齊王景達 江王景暹

太子翼 慶王茂 韓王從善 鄧王從益

吉王從謙 從度傳亡 從信傳亡 宣城公仲宣

卷第八

義養傳

徐宣祖 徐知訓 徐知詢 徐知誨子景遼

徐知諫 徐知證 徐知諤

卷第九

列傳

周本 李德誠 王輿 李章

王安 韋建 高審思

卷第十



列傳

李建勳

常夢錫

嚴續

潘承祐

游簡言

張延翰

徐玠

李夷鄴

卷第十一

列傳

刁彥能

周宗

馬仁裕

何敬洙

柴克宏

劉宗俊

王崇文

邊鎬

卷第十二

列傳

盧文進

李金全

王彥儔

林仁肇

卷第十三

儒者傳

陳誨

申屠令堅

韓熙載

江文蔚

高越

孫魴

卷第十四

儒者傳

劉洞

江為

汪台符

史虛白

郭昭慶

康仁傑

伍喬

周彬

夏寶松

徐錯

卷第十五

御



隱者傳

江夢孫

沈彬

陳貺

陳陶

許堅

毛炳

顏詡

鄭元素

卷第十六

義死傳

劉仁贍

孫晟

張彥能

鄭昭業附

卷第十七

義死傳

皇甫暉

孟堅

陳喬

劉彥貞

朱令贇

胡則

卷第十八

廉隅傳

姚景

魯崇範

馬文義

許規

苛政傳

張宣

李德柔

卷第十九

誅死傳

褚仁規

王建封

李德明

皇甫繼勳

鍾謨

張巒

潘佑

李平

書 卷第二十



黨與傳

宋齊丘

卷第二十一

黨與傳

陳覺

李徵古

馮延巳

馮延魯

魏岑

查文徽

卷第二十二

歸明傳

蕭儼

劉承勳

邵拙

舒雅

盧絳

劉茂忠

李元清

陸昭符

卷第二十三

歸明傳

朱弼

孟賓于子歸唐

潘賁

蒯鼈

羅穎

盧郢

丘旭

黃載

湯悅

附

張洎

附

徐鉉

附

卷第二十四

方術傳

吳紹

木平和尚

李冠

道士譚紫霄

潘宸

女冠取先生

卷第二十五



談諧傳

申漸高

李家明

楊名高

王感化

彭利用 附

卷第二十六

浮屠傳

小長老

北僧 附

玄寂

應之

妖賊傳

張遇賢

諸祐

卷第二十七

叛臣傳

劉澄

朱元

劉從効 附

卷第二十八

滅國傳

閩王氏 殷

卷第二十九

滅國傳

楚馬氏

卷第三十

建國譜

世系譜

南唐書目錄 終



卷之三十一

卷之三十二

卷之三十三

卷之三十四

卷之三十五

南唐書卷之一

先主



土運中圯諸侯跋扈基構自吳紹于唐祚作先主書  
 先主姓李唐宗室裔也小字彭奴其父榮榮之父志  
 志之父超超蚤率志為徐州判司因家焉榮性謹厚  
 適丁世亂晦迹民間號李道者彭奴以光啓四年生  
 於彭城未名故書小字流寓濠泗吳武王揚行密克濠州得  
 之竒其狀貌養以為子而楊氏諸子不能容行密以  
 乞徐溫乃姓徐名知誥溫嘗夢水中黃龍十數溫獲  
 一龍而寤翌日得知誥知誥奉溫以孝聞從溫出不



如意杖而逐之及歸拜迎門温驚曰爾在此也知誥泣曰爲人子捨父母何適父怒而歸母子之常也温由是愛之逮壯身長七尺廣頰隆準精彩鑠人語聲清暢常緩行從者濶步不能及相工云此龍行虎步也從温攻伐身先士卒爲樓船軍使以舟兵屯金陵柴再用攻宣州用其兵殺李遇以功拜昇州刺史時江淮初定州縣吏多武夫務賦歛爲戰守知誥獨好學接禮儒者能自勵爲勤儉以寬仁爲政遠近嚮風郡政大治徐温鎮潤州以昇宣常池黃爲屬温聞知誥理昇州有善政往視之見其府庫充實城壁修整

乃徙治之而遷知誥潤州刺史知誥初不欲往屢求宣州温不與時温嫡子知訓爲淮南節度副使秉國政知誥至京口不樂旣而知訓爲朱瑾所殺温居金陵未及聞知誥居潤州近廣陵得先聞即以州兵渡江定亂遂爲淮南節度副使温至以次子知詢等皆少用知誥猶愈於他人因留輔政宋齊丘曰潤州之命實天贊也初徐氏諸子不齒知誥而知訓尤悖嘗召知誥飲酒伏劒士欲害之行酒吏刁彥能酒至知誥以手爪搯之知誥悟起走乃免後日誥自潤州入覲知訓與飲於山光寺又欲害之徐知諫以謀告



知誥知誥起遁去知訓以劔授刁彥能使追殺之及於中塗而還給以不及由是得免及知訓死溫意潤州預謀就知訓廡有土室繪畫溫像身被五木諸弟皆執縛受刑而盡知訓衮冕正座皆署其名溫見之唾曰狗死遲矣知誥因得疏其罪惡由是內外全活者甚衆而死者猶數家知訓與僧修睦親狎得偽讖數紙皆修睦手書溫求修睦殺之越人寇毗陵溫伐越知誥以王府兵會戰於無錫前軍敗賊乘之甚急溫暴得熱疾不能治軍知誥率所領疾戰大破之斬首數千級越人棄輜重夜遁時四境底定惟越人爲

梗因此請平而兵甲遂戢知訓之用事也常陵弱楊氏而驕侮諸將遂以見殺及知誥秉政乃寬刑法推恩信起延賓亭以待四方之士引宋齊立駱知詳王令謀爲館客士有羈旅於吳者皆齒用之常陰使人察視民間有凶荒匱乏者賙給之盛暑未嘗張蓋操扇左右進蓋必却之曰士衆尚多暴露我何用此以故溫雖遙秉大政而吳人頗歸知誥武義元年拜左僕射知政事漸復朝廷紀綱脩典禮舉法律以抑強暴中外謂之政事僕射溫行軍司馬徐玠勸溫以己子代知誥溫遣子知詢入廣陵謀代知誥秉政會溫



病卒知詢奔還金陵嗣温為節度使諸道都統所為多不法常謀知誥知誥使諭之入朝遂留為左統軍吳主僭帝號改元乾貞知誥欲自尊大故奉楊溥尊號書溥僭號則南唐之罪著矣知誥累遷侍中中書令太尉都督中外諸軍事封潯陽公改封豫章公大和三年公出鎮金陵如温之制以長子景通為司徒平章事居中輔政以王令謀宋齊丘為左右僕射同平章事四年封公為東海郡王五年進封齊王始書小字書名既而以見其漸六年召景通至金陵為鎮海軍節度副使以其次子景遷為太保平章事與令謀等秉國政天祚元年王進位太師天

下兵馬大元帥二年景遷病以次子景遂為門下侍郎參知政事冬安遠軍盧文進來降三年閩越諸國皆遣使勸進人望已歸於是加殊禮建齊國置宗廟以宋齊丘為左丞相徐玠為右丞相冬十月受吳禪攝太尉楊璘奉上皇帝璽綬國號大齊改元昇元策吳主曰受禪者臣知誥謹上策皇帝為高尚思玄弘古讓皇帝追尊考温為武皇帝自温以上不追尊則復姓之心見矣子景通吳王景遂壽王景達信王弟知證江王知諤饒王以建康為西都廣陵為東都十有二月己卯朔日有白虹二以揚州海陵縣為泰州割泰興鹽城興化



如臯四縣屬焉以海陵制置使褚仁規為刺史廬州

周本卒凡書某州某人皆其節度使帝輟視朝一日食不舉樂書

者以見其僭極惡重也凡甲午皇后宋氏受寶冊是

歲閩王昶貢方物于京師天子使散騎常侍盧損如

閩冊昶閩王不受閩自麟已僭帝號改元矣既稱帝故不受王爵凡書京師皆中原也

書天子尊正統以別諸國僭偽

二年春三月壬子日有白虹二壬申大星流于東方

夏四月遷讓皇于丹陽以王輿為浙西節度使留後

馬思讓為丹陽宮使以嚴兵守之徐氏諸子屢請帝

復姓帝謙抑不忍忘徐氏恩下其議百官百官皆請

乃復姓李改名昇國號大唐遂考服屬當建王恪後

建唐廟祀高祖太宗以下如唐舊典追尊建王恪為

孝靜皇帝廟號定宗超為孝平皇帝廟號成宗志為

孝安皇帝廟號惠宗榮為孝德皇帝廟號慶宗奉徐

武皇廟號義祖徐氏二王如初諸孫皆郡公女郡縣

主齊臺門下侍郎張居詠中書侍郎李建勳皆平章

事吳中書侍郎張延翰為右僕射平章事以虔州李

章鎮廬州神武統軍王安為百勝軍節度使秋七月

一時無事冬十月戊寅天子受徽號于契丹曰英武

明義皇帝尤非常錢元瓘以嘉興縣為秀州十有一



月以步騎八萬講武于銅橋賜將吏以下金帛有差讓皇殂帝率百官素服哀臨命有司供具如吳舊禮謚曰睿十有二月福州亂連重遇弒其君相立王子他國驥王子延政爭立於是僭位于建州國號大殷悉書者為保大三吳世子璉先娶帝女是為永興公主璉

年取閩張本

以公主故為中書令康化軍節度使

三年春正月丙申詔曰比者干戈相接人無定主地易而弗藝桑隕而弗蠶衣食日耗朕甚憫之其嚮風面內者有司計口給食願耕植者授之土田仍復三歲租役於嘻仁不異遠化無泄邇其務宣流以稱朕

意二月池州楊璉卒以統軍王彥儔為康化軍節度使詔公卿以下議定郊祀門下侍郎平章事居詠中書侍郎平章事建勳等議曰孔子云郊祀后稷以配天宗祀文王於明堂以配上帝此萬世不易之法也昔長孫無忌請祀高祖於圓丘以配昊天上帝祀太宗於明堂以配上帝蓋得之矣今國家嗣興唐祚追尊孝德而以神堯為肇祀之祖宜以神堯配天於圓丘以孝德配上帝於明堂禮也其服物制度古有常儀一切偽飾願皆罷去奏可司徒齊丘請依春秋郊以四月上辛常夢錫駁曰案禮天子之郊以冬至不



卜日魯侯之郊以仲春卜上辛今之四月非郊之時  
齊丘固爭遂用夏四月夏讀爲夏商之夏魯用周之四月郊議者多哂  
之詔曰禮莫重於享帝孝莫大於隆親事實重大承  
以輕眇可謂無其德而用其事祇加畏焉於嘻爾公  
爾侯各揚厥職不供廼事國有常典夏四月上辛始  
郊祀於圓丘大赦境內是夜月當以子初沒而升壇  
之際皎然如晝衆咸異之遍行封賞羣臣請上徽號  
不許固請之帝曰朕以眇躬託于民上夙夜祇畏常  
恐弗類矧廼徽號用揚虛美是重弗類固不許因此  
廢徽號之禮州郡言符瑞者十數帝曰譴告在天聰

明自民魯以麟削莽以符亡常謹天戒猶懼或失之  
符瑞何爲哉皆抑而勿揚言五代同居者七家其尤  
著者江州陳氏元和給事中京之後宗族七百口每  
日設廣席長幼以次坐而共食有畜犬百餘共一牢  
食一犬不至諸犬爲之不食建書樓於別墅以延四  
方之士肄業者多依焉鄉里率化獄訟希少遠近歎  
異之皆蠲復征役旌表門閭秋七月庚子朔日有蝕  
之八月鄂州張宣卒以潤州留後王輿代金吾衛大  
將軍馬仁裕出爲鎮海軍節度使留後冬十月  
四年春正月夏四月樞密使周宗出爲奉化軍節度



使六月安州節度使李金全來降遣鄂州屯營使李承裕帥師迎之承裕與晉將馬全節安審暉戰于安陸承裕及裨將段處恭戰死監軍通事舍人杜光鄴及其兵五百人被執天子厚賜之遣還帝致書于晉復送光鄴等請以敗軍行法天子又遣之帝以甲士臨淮拒之乃止天子晉高祖也書帝致書于晉惡其批也以金全為宣威統軍洪州李德誠卒以宣州徐玠代以江州徐知證為寧國軍節度使梁王徐知諤卒秋八月廬州李章卒以潤州馬仁裕代以天威統軍盧文進為鎮海軍節度使冬十月幸東都存省故老宴于舊宅踰月還

十有二月左僕射平章事張延翰卒五年春正月虔州王安卒以統軍賈浩為百勝軍節度使三月誅秦州刺史褚仁規夏四月秋九月壬子有星孛于天市錢元瓘卒佐嗣位冬十有二月葬吳越文穆王凡他國廢

立卒葬弒殺告問通則書

六年春三月廬州馬仁裕卒以滁州刺史周鄴為保信軍節度使留後夏四月南漢劉龔卒玠嗣位葬劉

龔僭謚天皇大帝

以其僭極惡重故書與吳越異龔音儼劉氏偽撰此字以為名自云

取飛龍在天之義

遷讓皇子孫於海陵號永寧宮嚴兵守之

絕不通人久而男女自為匹偶吳人多哀憐之

猶書吳人



者以其思舊之民也 詔吳王景通為太子景通表曰古之立太子所以崇正嫡息覬覦如臣兄弟稟承聖教實為敦睦願寢此禮三表許之乃以大元帥府掌記壽州高審思王以駕部郎中馮延巳為元帥府掌記壽州高審思率以待衛諸軍都虞候姚景為清淮軍節度使六月乙丑天子崩晉高祖秋七月丞相大司徒宋齊丘為鎮南軍節度使以洪州徐玠為司徒侍中帝曰豫章大司徒維桑也衣錦晝行古人所貴以錦袍賜之齊丘至鎮衣以視事羣臣咸謂江淮之地頻年豐稔兵食既足士樂為用天意人心未厭唐德宜廣土宇攻自

潭越始帝曰吾少長軍旅見干戈之為民患甚矣吾不忍復言兵革使彼民安則吾民亦安矣吳越災宮室府庫甲兵殆盡羣臣復請乘其弊帝曰今大敵在北北方平則諸國可尺書召之何以兵為輕舉者兵之大忌宜畜財養銳以俟時焉使使唁越于武林厚幣以調其闕冬十月詔曰前朝失御強梗崛起大者帝小者王不以兵戈利勢弗成不以殺戮威武弗行民受其弊蓋有年也或有意於息民者尚以武人用事不能宣流德化其宿學巨儒察民之故者堪巖之下徃徃有之彼無路光亨而進以拊偃為嫌退以清



寧為樂則上下之情將何以通簡易之政將何所議乎昔漢世祖數年之間被堅執銳提戈斬馘一日晏然而兵革之事雖父子之親不以一言及之則兵為民患其來尚矣今唐祚中興與漢頗同而眇眇之身坐制元元之上思所以舉而錯之者玃玃在疚罔有所發三事大夫可不務乎自今宜舉用儒者以補不逮於是稍用儒臣漸去苛察又將修復故事為後代法未果行而帝疾作

七年春二月詔曰廼公廼侯越百執事欽承嗣命命爾保元子璟祗肅天鑒社稷宗廟永有終戒不敢知

曰其基永昌我亦不敢知曰墜命罔後天不爾謚祐于有德厥位艱哉翌日殂于路寢壽五十六葬永陵

謚光文肅武孝高皇帝廟號烈祖

徐鉉曰烈祖少長喪亂知人艱苦故

不以富貴自處唯務節儉身為宰相事養父母如禮飲食皆親侍或遇疾不解帶温常責諸子曰汝輩能如是乎及建號即金陵使府為宮唯加鴨尾欄檻而已終不改作接見親族如家人禮尊長者親拜之晚年服金石藥性多躁怒百司奏事必至厲聲訶責羣臣或正色抗辭以對事理明白必斂容慰勉之旬日之後多有恩澤故人思盡力決死刑用三覆三奏之法文武亡歿子孫隨才以叙不限資歷或營其婚嫁幼未堪任與其無嗣者內帑以給之有親老者倍其數死王事者下至卒伍皆三年給其全俸故士無貴賤悉亡身外之憂

嗚呼積厚者流澤遠積薄者流澤狹不其然乎舜之



後千餘年而有陳陳亡而田氏專政於齊禹之後千餘年而有杞杞削而勾踐得志於越後世之君建大義於一時而德不若舜禹者亦隨其澤之遠近而興起焉故晉以天下喪於狄人而瑯琊繼之唐以天下篡於朱梁而烈祖紹之然則盜名器操生殺制一方之命抗萬乘之勢者豈非天歟烈祖之起雖無雄才大畧而深沈寬裕本於天性幸而適丁中原擾攘之際故數年之間有足觀者

南唐書卷之一

南唐書卷之二

嗣主書第二

民靡有定誰其奠之弃師閩楚命委輿尸作嗣主書嗣主諱璟字伯玉初名景通烈祖元子也美容止器宇高邁性寬仁有文學甫十歲吟新竹詩云棲鳳枝梢猶軟弱化龍形狀已依稀人皆竒之起家爲尚書郎吳讓皇見之曰吾諸子皆不及也累遷諸衛大將軍典治軍旅撫納將校烈祖出鎮金陵拜璟司徒平章事知內外諸軍事加諸道副都統烈祖受禪封吳王累遷太尉中書令諸道元帥錄尚書事改封齊王



既當儲副之地而固讓再三謙虛下士常若弗及烈  
祖殂授顧命猶讓諸弟辭益堅侍中徐玠以袞冕被  
之曰大行付殿下以神器之重殿下固守小節非所  
以遵先旨崇孝道也乃嗣位改元保大太常博士韓  
熙載上疏曰踰年改元古之制也事不師古弗可以  
訓時雖可其奏而制書已行遂改元冊母宋氏為皇  
太后妃鍾氏為皇后弟景遂改封燕王弟景達改封  
鄂王弟景暹改封保寧王長子翼南昌王文武進位  
有差洪州宋齊丘入為左丞相江州周宗入為右丞  
相以元帥府掌書記馮延巳為諫議大夫翰林學士

夏四月戊申朔日有食之中書侍郎平章事李建勳

罷為昭武軍節度使南漢劉晟弒其君玠自立為

帝不書僭者玠之前已僭也五月司徒兼侍中徐玠卒秋七月燕

王景遂改封齊王拜諸道兵馬大元帥太尉中書令

鄂王景達改封燕王拜副元帥宣告中外以兄弟相

傳之意以元子南昌王翼為江都尹東都留守書元子以

見景遂之不景遂固讓不許蕭儼上疏其畧曰夏商

之後父子相傳不易之典惟仰循古道以裕後昆疏

奏不報冬十月庚戌有星孛于東方妖賊張遇賢聚

眾十餘萬陷虔州諸縣諸縣舊虔州城守遇賢據白



雲洞命洪州營屯都虞候嚴思禮通事舍人邊鎬討  
賊鎬思禮擒遇賢及賊副黃伯雄謀主僧曹景全斬  
於建康市以嚴思禮為海州刺史邊鎬為洪州屯營  
諸軍都虞候貶百勝軍節度使賈浩為監門衛將軍  
罪貶故書使池州安置以饒州刺史李翱為百勝軍節度  
使留後十有二月下令中外庶政並委齊王景遂叅  
決文武百司唯樞密副使魏岑查文徽得白事餘非  
召對不得見蕭儼上書極論曰元帥開府人猶驚駭  
况委之大政而羣臣不得時見臣恐中外隔絕姦人  
得志非陛下之利也書奏不報侍衛軍都虞候賈崇

詣閣求見曰臣事先朝二十餘年每見延接踈遠未  
嘗壅隔羣下之情罔有不達今陛下始即位所委任  
者何人而頓與羣臣謝絕深居邃處而欲聞民瘼猶  
惡陰而入乎隧道也臣老矣長不復奉顏色因涕泗  
嗚咽帝深為感動引與之坐賜食而出始以手札批  
喻儼等曰旻天不弔降此鞠凶越予小子常恐弗類  
于厥德用災于厥躬故退處恭默思底于道而壅隔  
之弊以為卿憂惟予小子實生厲階由是所下之令  
遂寢時宋齊丘周宗為左右丞相齊丘專執而宗純  
謹自守及上心既悟齊丘乃言其非便帝曰公何不



早誨我遂罷齊立為浙西節度使齊立黨與隆熾造  
作飛語以誣宗宗泣而上訴帝知之弗問此為明年宗出張本

宋齊立上表乞歸九華舊隱許之賜號九華先生封

青陽公食青陽一縣

二年春正月右丞相周宗罷除江西節度使門下侍

郎平章事張居詠罷除浙西節度使二月辛卯日有

白虹二三月左衛上將軍盧文進卒夏閩人朱文進

連重遇弒其君曦重遇立文進使來告亂囚其使議

伐閩以民疫釋閩使遣之夏四月秋七月鄂州王與

卒以神武統軍韋建為武清軍節度使備書官職者新命也書某

州某人代者移鎮也壽州姚景卒以濠州劉崇俊代以楚州刺

史劉彥貞為濠州觀察使九月庚午朔日有食之冬

十有二月馮延巳為翰林學士承旨水部員外郎馮

延魯為中書舍人延魯銳於功名欲興建州之役乃

贊中書舍人查文徽為江西安撫使翰林待詔臧循

者嘗賈於閩具知山川險易為文徽陳進兵之計文

徽因是請伐閩乃命邊鎬率洪州屯兵與文徽俱行

遂入建陽王延政遣統軍使吳承祐以遊兵巡福州

境給曰唐助我討賊大軍至矣福州信之連重遇殺

朱文進裨將林仁翰殺重遇函其首歸承祐延政以



其子繼昌守福州親率衆以拒我師五郡之兵大集

五郡福建江漳泉

敵勢甚盛文徽等次于蓋竹退復屯建陽

啓求濟師三年春二月遣祖全恩何敬洙率萬人以  
應文徽與延政陣隔水全恩使建陽降將孟堅潛師  
出其後裨將武彥暉馬存貴以輕銳繼之腹背夾擊  
延政大敗以餘兵城守閩人李仁達殺其君之子繼  
昌前年以福州降延政故以延政爲君及其統軍吳承祐立雪峯僧卓  
儼明爲主儼明無統御之畧仁達又殺之而自稱留  
後遣使來降即以仁達爲威武軍節度使延政益不  
振建州之險要曰西巖延平津相繼而平夏四月秋

七月庚辰星見而風雨八月甲子朔日有食之遂克  
建州執王延政歸于建康授羽林大將軍安化軍節  
度使封鄱陽王泉州刺史王繼勳漳州刺史王繼成  
汀州刺史許文績皆請降因而鎮撫之諸將下建州  
兵無節制剽掠甚衆閩人失望帝以出師有功不錄  
其過升建州爲永安軍以祖全恩爲節度使查文徽  
爲撫州刺史何敬洙爲楚州刺史偏將王建封先登  
功第一爲信州刺史全恩未拜而卒以廬州王崇文  
鎮建州泉州裨將從効劫刺史王繼勳使之入朝從  
効自領州事於是王繼成許文績皆至建康以繼勳



爲池州團練使繼成爲和州刺史文鎮爲蘄州刺史  
即以劉從効爲泉州刺史冬十月皇太后宋氏殂以  
延平津爲劍州割建州之劍浦汀州之沙縣屬焉以  
建州裨將陳誨爲劍州刺史以龍衛都虞候劉仁贍  
爲武清軍節度使升泉州爲清源軍以泉州刺史劉  
從効爲節度使

四年春正月陳覺諷齊王景遂言宋齊立先朝布衣  
之舊委諸山林不允中外之望帝使景遂至青陽召  
之起拜太傅奉朝請而已以撫州李建勳爲左僕射  
門下侍郎平章事中書侍郎馮延巳拜平章事吏部

尚書徐連爲鎮海軍節度使二月壬戌朔日有食之  
命建州製的乳茶號曰京挺騰茶之貢自此始罷貢  
陽羨茶夏四月侍衛諸軍都虞候賈崇爲奉化軍節  
度使留後葬元恭皇后于永陵六月壽州劉崇俊卒  
以濠州觀察使劉彥貞爲清淮軍節度使侍衛諸軍  
都虞候郭全義出爲濠州觀察使以劉崇俊子範爲  
滁州刺史建州之役府庫中耗民不堪命故李仁達  
劉從効皆羈縻而已至是諸將請討之不許宋齊立  
薦陳覺爲福建路宣諭使說仁達入覲不從覺還至  
建安矯制發建汀撫信之師及防戍之兵掩其不意



徑至城下時魏岑安撫漳泉聞覺起兵亦擅發兵應  
覺帝大怒馮延巳等為言兵集行不可止乃以王崇  
文為招討使王建封為副使益兵以會之馮延魯為  
南面監軍使魏岑為東面監軍使陳覺為諸軍監軍  
使仁達送款於吳越吳越以兵三萬應之覺等爭功  
進退不相應延魯及吳越戰延魯敗績諸軍皆潰帝  
怒遣使者鎖覺延魯至金陵而馮延巳為宰相宋齊  
丘亦預三公稍解之貞外郎韓熙載諫曰臣觀覺等  
罪不容誅但齊丘延巳內為陳請所以得全且擅興  
者不罪則疆場生事喪師者獲存則行陣解體請行

顯戮以重軍威帝曰齊丘延巳有自咎之表無請赦  
之辭覺等五木被體一家狼藉永不錄用與死何殊  
乃流覺蘄州流延魯舒州齊丘惡之貶熙載和州司  
馬冬十有二月壬戌契丹及晉師戰于中渡晉師敗  
績丙寅杜重威李守貞以王師降于契丹癸酉張彥  
澤引蕃騎陷京師彥澤剽劫屠害甚眾晉帝奉表納  
璽於戎主以其失利勢  
故不書天子是歲中原無主密州刺史皇  
甫暉青州刺史王建及汭淮諸戍皆來降方且疲兵  
東南不暇北顧馮延巳延魯魏岑陳覺皆以姦回得  
用人情不平既流延魯及覺而延巳為相岑亦居近



密於是御史中丞江文蔚疏其罪曰二凶雖去未稱  
民情四罪盡除方明國典帝大怒貶文蔚江州司士  
叅軍亦罷延巳為太子少傅岑為太子洗馬漳州裨  
將林贊堯殺監軍周承義以叛討平之以泉州裨將  
董思安為漳州刺史思安辭以父名章命改漳州為  
南州副使劉從願殺思安自領州事南州復為漳州

南唐書卷之二

南唐書卷之三

嗣主書第三

五年春正月晉帝舉族出封丘門虜主次于京城北

不見帝

虜不與之見也猶書曰京城者甚虜之惡也

文武百官素服紗帽

俯伏俟罪虜主命起之親加慰撫遂入都城據大內

改京師為都城晉無君也

已丑斬張彥澤於東市

以其剽劫之罪

庚寅洛

京留守景延廣自扼其喉死辛卯虜廢晉帝為光祿

大夫檢校太尉封負義侯黃龍府安置

此中原之事悉書者以下

文使來告故也

虜使來告曰晉少主逆命背約自貽廢黜吾

主欲與唐繼先世之好將冊命唐為中原主帝命近



臣對曰唐守江淮社稷已固與梁宋阻隔若爾主不  
忘先好惠錫行人受賜多矣其他不敢拜命之辱遣  
兵部侍郎賈潭報聘帝歎曰閩後憊矣其能抗衡中  
原乎以齊王景遂為太弟燕王景達為元帥改封齊  
王元子南昌王奐為副元帥封燕王依前東都留守  
安樂公茂為侍衛諸軍都虞候二月丁巳朔虜改晉  
都為大遼國肆青改元會同猶謂之晉都者漢未立  
也不謂之京師者中原  
無主也不書赦不天子即位  
易代則書改晉開  
與虜赦中國也 辛未漢帝即位  
運四年為天福十二年中原改元不書此書會同非  
常也漢稱天福十二年亦非  
也常三月宣州徐知證率夏四月丙子太白晝見以皇

甫暉為神衛軍都虞候秋八月以太傅宋齊丘為鎮  
南軍節度使周宗為寧國軍節度使錢佐率保襲位  
冬十有一月壬子雨木冰辛酉雨木冰癸酉雨木冰  
十有二月越人胡進思廢其君侑囚於義和院錢俶  
入是歲馬希範率希廣襲位

六年春正月越人立俶遷侑于東府丁丑天子崩漢高

祖以太子少傅馮延巳為昭武軍節度使夏四月盧

州周鄴率五月葬楚文昭王葬吳越忠獻王越亂六  
故緩

月庚寅朔日有食之秋漢伐河中圍李守貞守貞遣

從事朱元李平奉表來乞師以潤州李金全為西面



行營招撫使壽州劉彥貞為副諫議大夫查文徽為  
監軍使兵部侍郎魏岑為公准巡撫使聞河中平遽  
班師冬十有一月高從誨卒保庸嗣位葬南平文獻  
王

七年春正月淮北諸盜來附以神武都虞候皇甫暉  
裨將張巒蕭處恭帥師出海泗諸郡以右散騎常侍  
張義方為監軍使納賊帥咸師朗以歸二月以中書  
舍人嚴續為奉化軍節度使以江州賈崇為神武統  
軍侍衛諸軍都指揮使夏四月壬申太白晝見贈故  
廬山江夢孫國子司業六月癸酉朔日有食之秋七

月殺天威統軍都虞候王建封八月以建州王崇文  
鎮廬州以諫議大夫查文徽為永安軍節度使留後  
冬十有二月日暈三重

八年春正月詔曰春秋日食地震星孛木冰可謂甚  
矣比者災異仍多豈人君不德以召之耶抑亦天心  
之仁愛而譴告之也朕甚惕焉曩者兵連閩粵武夫  
悍將不喻朕意而務為窮黷以至父征子餉上違天  
意下奪農時咎將誰執在予一人其大赦境內窮民  
無告者大賜粟帛二月以東都留守燕王翼為潤宣  
二州大都督鎮京口宣州周宗為東都留守福州許



言吳越戍兵亂殺李仁達而遁遣人告急于境建州節度使查文徽以興兵故書使劍州刺史陳誨以舟師應之文徽留誨屯江口進至西門伏兵發文徽被執誨與越人戰大敗之獲其將馬先進葉仁安等歸于建康帝送先進等還越越亦歸文徽夏四月以劍州刺史陳誨為永安軍節度使秋七月冬十有一月甲子朔日有食之乙酉天子崩漢隱帝楚朗州節度使馬希萼遣使來乞師遂以楚州屯兵攻潭州殺希廣杖其妻死於市左右用事者皆鬻割之希萼自稱楚王邊鎬統信州屯兵以覘楚十有二月漢將郭威領大軍北

征壬子次澶州何福進率壯士擁威為天子

書此以見中原

治亂

九年春正月周帝即位劉昫稱帝於太原

以其曲在周故不曰

僭

初契丹犯河南晉帝北遷韓熙載上書曰陛下有

經營天下之志當在今時若戎主遁歸中原有主安

輯稍定則未可圖也時以連兵南閩至此方議北征

熙載又上書曰郭氏姦雄雖有國日淺而為理已固

兵若輕舉非獨無成亦且有害乃命李金全耀兵於

淮上而止夏四月秋七月樂安公茂卒冬十月楚人

徐威陳遷魯公綰陸孟俊執其君馬希萼囚于衡山



立王子希崇十有一月楚人廖偃等招合蠻獠復立希萼爲楚王楚國大亂邊鎬以信州屯兵出宜春討長沙破其軍於龍回關徐威等以希崇降希萼亦送欵于鎬鎬盡遷馬氏之族于金陵以希萼爲洪州大都督封楚王希崇爲舒州節度使以邊鎬爲湖南節度使鄂州劉仁贍以舟師趨岳州岳州降以將軍宋德權爲岳州刺史以客省引進使任鎬爲監軍使以馬光惠爲朗州節度使留後宋齊丘拜太師固辭復爲太傅

十年春正月分洪州高安縣置筠州割清江萬載上

臯屬焉以湖南行營糧料使王紹顏爲刺史三月以撫州馮延巳爲左僕射平章事右僕射孫晟守本官平章事潤州徐連中書侍郎平章事夏四月丙戌日有食之五月司徒致仕李建勳卒秋劉晟取桂管將軍張巒爭之不克朗州裨將劉言執留後馬光惠送建康言自領州事遣李建期屯益陽將討劉言而楚地新定府庫空虛宰相馮延巳以克楚爲功不欲取費於國乃重斂其民以給軍邊鎬不能振撫楚人皆怨帝亦惡之謂馮延巳孫晟曰湖湘之役楚民厭亂求息肩於我今欲罷桂陽之師解益陽之戍即授劉



言以節鉞使自安輯其民吾亦得惠養湘衡之地如是則遠邇完實二蕃在吾度內爾公等亟行之無為後悔孫晟即欲奉行延巳曰吾以偏師克全楚天下驚動今三分喪二何以爲功遂稽其命未幾劉言遣王進逵破益陽殺建期等乘勝攻長沙邊鎬遁歸所在屯戍相繼散走獨張巒全師而還且戰且行取資於道岳州刺史宋德權監軍使任鎬皆弃城走帝大怒削邊鎬官流饒州戮宋德權任鎬于大社斬裨將申洪泰尹建于都門外以張巒爲信州刺史延巳等自劾起之孫晟請罪不已乃罷爲右僕射冬十有二

月洪州大都督馬希萼入覲留建康弗遣

十有一年春二月周行馮據潭州三月建康大火踰月廬舍營署殆盡夏五月以太傅宋齊丘爲鎮南軍節度使秋七月以鄂州劉仁贍爲神武統軍侍衛都指揮使以濠州觀察使何敬洙爲武清軍節度使大蝗八月不雨冬十月築楚州白水塘以溉田命州縣陂塘堙廢者修復之十有二月水冰

十有二年春正月大星墜于東北聲如雷兗州節度使慕容彥超遣使來乞師以拒周出兵數千至淮北

不書將校爲周師所敗俘其將校于京師天子平彥

舊史失之



超釋唐俘諭之曰歸語爾主朕誅逆命何苦來援帝亦悔之漢末遣使潭州市茶會邊鎬平馬氏例俘于金陵由是引對慰勞以上茗萬斤遣之壬辰天子崩周太祖自前年八月不雨至于三月民大饑疫死者大半下令郡縣煮粥以食之劉旻乞師于契丹以寇潞州天子親征大敗之休兵潞州大饗將士斬敗將樊受能等七十餘人軍威大振進圍太原遣符彥卿史彥超等北控圻口以斷契丹援路彥卿等敗績彥超戰沒天子遽班師書以見世宗威畧為明年伐我張本夏五月丁亥月重輪秋七月契丹使其舅來聘昇元中宋齊丘選宮

嬪雜以珠貝羅綺泛海北通契丹欲賴之以復中原而虜使至則厚幣遣還迨至淮北輒使人刺之復遣使公海齎琛寶以報聘虜意晉人殺其使數犯中原至是館虜使於清風驛夜醜更衣盜斬其首契丹自此不至蓋中原間之也冬十月

十有三年春二月以門下侍郎嚴續守本官平章事夏四月以壽州劉彥貞為神武統軍侍衛諸軍都指揮使以劉仁贍為清淮軍節度使三月周伐蜀秋七月蜀使來聘冬十月東都留守周宗乞罷鎮詔曰崧嶽降靈誕生良弼佐我先朝施及朕躬尚賴保釐底



于成績而遽爾請罷豈朕不德不能優禮勲舊而致然也昔蕭何守巴蜀而高祖無西顧之患寇恂守河內而光武無分民之嫌今任公以何恂之事宜強飯扶力以副朕意於嘻國之安危惟茲淮甸慎始成終非公而誰所請宜不允宗以老病三表乃許守司徒致仕以中書舍人馮延魯爲工部侍郎東都留守以侍衛諸軍都虞候賈崇爲東都屯營使十有一月周師來伐李穀爲都部署攻壽州帝召洪州宋齊丘還都齊丘請徵諸郡兵屯於淮泗以裨將有才略者主之聲言偏師敵人不測其實必難輕進春水時至糧

道阻隔懸軍日久自當遁去然後遣使請平彼必樂從議者不同遂止劉彥貞督兵以抗周師江州皇甫暉帥師爲援李穀退屯正陽天子命李重進爲奇兵以要彥貞彥貞追穀至正陽重進與穀腹背擊之彥貞大敗死于陣諸軍皆潰張全約以其衆奔壽春自楊氏王吳淮甸之人不識干戈者二十餘年及彥貞敗民皆恟懼帝欲親拒周師中書舍人喬匡舜極諫貶匡舜臨川親行之議亦寢天子先詔錢俶攻常宣二州以撓我師於是吳越伺間攻常州刺史趙仁澤被執將軍柴克宏救常州大敗越人斬首千餘級獲



其將吏數十人皆斬於京口拜克宏奉化軍節度使  
天子營于淝水之陽徙正陽橋于下蔡林仁肇皇甫  
暉爭之不勝暉走滁州天兵追殺之以周師為天兵  
太祖主兵故也  
遂下滁州帝惡之遣泗州牙將王知朗至滁州稱唐  
皇帝奉書願効貢賦陳兄弟之禮天子不荅東都留  
守馮延魯光州刺史張紹舒州刺史周祚泰州刺史  
方訥皆弃城走延魯削髮偽為僧遁歸周人執之斬  
州裨將李福殺其刺史王承雋降周帝益惡之始改  
名景以避周廟諱遣翰林學士鍾謨文理院學士李  
德明奉表稱臣獻犒軍牛五百頭酒二千石金銀羅

綺數千請割壽濠泗楚光海六州以求罷兵天子不  
報謨等皆留行在分兵襲下楊泰帝遣人懷蠟丸書  
走契丹求救為邊將所執光州刺史張承翰降周天  
子至淮南下詔撫安楊氏之後帝聞之命園苑使尹  
延範自泰州徙讓皇一族于京口延範殺其子弟六  
十餘人以其婦女渡江周先鋒使劉重進得其玉硯  
瑪瑙碗翡翠瓶以獻周楊氏遂絕帝罵曰小人以不  
義之名累我腰斬延範歸之以專殺之罪



南唐書卷之三

南唐書卷之四

嗣主書第四

十有四年春正月遣司空孫晟禮部侍郎王崇質奉表于周辭益卑服削去帝號天子猶不荅留晟等弗遣鍾謨請歸取表盡獻江北之地天子許之遣崇質德明還始賜江南書曰自有唐失御天步多艱六紀于茲瓜分鼎峙自為聲教各擅蒸黎交結四夷憑陵上國華風不競否運所鍾凡百有心孰不興憤朕擅一百州之富庶握三十萬之甲兵農戰交修士卒樂用苟不能恢復內地申畫邊疆便議班旋直同戲劇



至於削去尊稱願輸臣節孫權事魏蕭登奉周古也  
雖然今則不取但存帝號何爽歲寒儻堅事大之心  
必不迫人于險德明等歸盛稱周天子英武帝尤惡  
之宋齊丘陳覺等皆以割地無益而德明賣國以圖  
利帝怒斬德明二月遣元帥景達帥師應壽春陳覺  
爲監軍使拜邊鎬爲大將許文績副之中書舍人韓  
熙載上疏請罷監軍使不報司徒致仕周宗卒三月  
江州柴克宏卒諸郡屯田相率起義以農器爲兵械  
帝爲鎧處處保聚號曰甲軍周師苦之景達等趨壽  
州其將朱元李平唐進克復舒蘄泰三州夏大雨周

師在楊滁和者皆却諸將請要其險隘擊之宋齊丘  
曰擊之怨深不若縱之以爲德誠諸將閉壁不得要  
戰周師皆集於壽州故諸州雖復而壽春之圍益固  
天子駐于渦口猶欲再幸揚州宰相范質以師老泣  
諫乃班師以李重進攻廬州向訓守揚州訓請棄楊  
州併力以攻壽春乃封府庫付主者遣淮南舊將按  
巡城中秋毫不犯而去淮人大悅皆負糗糧以送周  
師秋七月楊光滁和復歸于我冬十有一月周殺我  
行人孫晟

十有五年春元帥景達命其將朱元等屯紫金山築



甬道以餉壽州二月天子復來伐徙下蔡橋于渦口  
為鎮淮軍築二城以夾淮周師連破紫金山諸寨監  
軍陳覺乞罷朱元帝遣大將楊守忠代元且召之元  
憤怒叛降周諸軍皆潰許文鎮邊鎬被擒景達以州  
兵奔還金陵三月丁未劉仁贍病且死其副孫羽等  
以壽州降仁贍病卒夏四月己巳天子班師亂兵焚  
揚州民皆徙江南秋七月冬十月天子復來伐圍濠  
州刺史郭廷謂降周泗州守將范再遇叛降周廷謂不書  
叛者力不支也泰州亦潰周師步騎數萬水陸齊進軍士作  
檀來之歌聲聞數十里檀來者但來也北人語音十有二月天子

駐于楚州城北

十有六年春正月大赦改元交泰周師攻楚州守將  
張彥能鄭昭業城守益堅城壞彥能昭業戰死周人  
屠其城而戍之丁未海州潰壬辰靜海軍潰周人盡  
得海泰楊楚之地丁卯周人次揚州癸酉次瓜州三  
月壬午朔次泰州丁亥復次揚州辛卯遂幸迎鑾以  
臨大江周自屠楚州貶書人其後駐幸皆書次至迎鑾復書幸不泯其實也時楊泰滁  
和壽濠泗光海等州已為周得廼遣陳覺奉表獻廬  
舒蘄黃晝江以為界天子許之賜書曰皇帝恭問江  
南國主勞其良苦而已四年而後克亦已憊矣夏五月下令去



帝號稱國主奉周正朔以交泰元年為顯德五年鍾  
謨遇延魯至自京師國主復遣謨等奉表拜成且請  
傳位始降號稱國主傳位不曰傳乎天子優詔勞安  
其人者景遷為太弟時未定也之傳位之意遂止以謨為禮部侍郎延魯戶部侍郎  
以行營應援使林仁肇為浙西節度使前廬州孫漢  
威為奉化軍節度使贈劉仁贍太師追封衛王孫晟  
太傅追封魯國公劉彥貞中書令張彥能侍中其餘  
將士死國難者追贈有差秋泉州劉從効奉表貢于  
京師天子不納冬十月禮部侍郎常夢錫卒十有二  
月流陳覺于饒州流李徵古于洪州皆殺之放宋齊

丘于青陽太弟景遷固請歸藩於是以長子翼為太  
子以景遷為洪州大都督封晉王齊王景達為撫州  
大都督信王景暹為百勝軍節度使昇元初括定民  
賦每正苗一斛別輸三斗於官廩授鹽二斤謂之鹽  
米至是淮甸鹽場皆入於周遂不支鹽而輸米如初  
以為定式

顯德六年春正月宋齊丘縊死于青陽夏晉王景遂  
卒秋七月鍾謨請鑄大錢以一當十文曰永通泉貨  
以信州刺史張巒為天德軍使九月太子翼卒初丹  
陽古銘曰天子翼州人以翼應之未幾卒識者謂翼



州趙地也明年

皇朝受命之符爾次子從嘉封吳王居東宮鍾謨曰  
從嘉輕肆請立紀國公從善國主怒貶謨為國子司  
業立從嘉為太子天子使人謂國主曰吾與汝大義  
已定終慮後世不汝容可及吾世修城隍治要害為  
子孫計國主因營緝諸城謀遷都于洪州曰建康與  
敵境隔江而已又在下流敵兵若至閉門自守借使  
外諸侯能救國難即為劉裕陳霸先爾今吾徙豫章  
據上流而制根本上策也羣臣多不欲惟樞密使唐  
鎬贊成之夏六月熒惑守心光芒相射癸巳天子崩

周世宗秋七月升洪州為南昌建南都冬十月流鍾謨  
于饒州賜死貶張巒為宣州副使殺之十有二月罷  
鑄大錢明年周亡

編年之法絕筆於周亡者清風發而羣陰伏理固然  
也雖然無所述而遂泯其實則何以著李氏之罪故  
名器服物慶賞刑威直書其僭將以正其罪爾

建隆元年臣属于

皇朝夏四月太子太傅馮延巳卒是歲李重進使來  
乞師拒之遣馮延魯入貢以聞二年春以世子從嘉  
監國國主如南都所過慰勞守宰存問高年疾苦會



齊王景達于廬山歷覽勝境與從臣譚宴浹日而去  
 三月至南都以何洙為奉化軍節度使敬洙去敬字  
 豫章迫隘宮府營署皆不能容羣臣日夕思歸國主  
 悔怒唐鎬慙懼發瘍卒六月國主殂于南都年四十  
 有六在位十有九年秋七月國主之喪至自豫章羣  
 臣請殯別宮世子手札不許辭甚哀切書世子手札未即位也見  
 後主乃殯于萬壽殿遣使入

朝乞追復帝號

太祖皇帝許之謚明道崇德文宣孝皇帝葬順陵廟

號元宗先謚而後書葬者因其請號順文勢也徐鉉曰嗣主工筆札善騎射賓禮大臣敦睦九族

每聞臣民不獲其所者輒諮嗟傷憫形於顏色隨加  
 救療居處服御節儉得中初立有經營四方之志邪  
 臣阿諂職為厲階晚歲悔之已不及矣少有至性仍  
 懷高世之量始出閣即命於廬山瀑布前構書齋為  
 他日終焉之計及迫於紹襲遂捨為開先精舍常患  
 民間侈靡第宅衣服咸為節制驅惰遊之人率歸農  
 業及大漸之際群鶴翔于空鳴呼甚哉守成之難也  
 雙龍據殿屋遂奄然而化

非特守之難而授之者尤難非授之難而知其可受  
 者為難商有天下成湯作之太甲守之而中有不類  
 之憂嚮非阿衡之佐則求其思庸之復也難矣周有  
 天下武王作之成王守之而中有流言之變嚮非周  
 公征之則求其鳧鷖之雅也亦難矣以唐太宗之豐  
 功大業一正天下建不拔之基而晉王之立殺父之



臣失父之政卒至於大亂矧不及於太宗者乎元宗  
即位一十九年有經營四方之志約已慎刑勤政如  
一嚮非任用羣小屏棄忠良國用不殫於閩楚師旅  
不棄於淮甸則庶幾完成之君也志有之曰揚者易  
生之木也一人植之十人拔之無生揚矣以新造之  
唐而守之非道不幾乎朝蔣而夕握其亡也不旋踵  
故周世宗以衰世之鋒一鼓而十四州之地掇如也  
悲夫

南唐書卷之四



